

Ex gobernador Olindo Koolman a duna un bista unico di su termino como gobernador

“Un di mi momentonan mas dificil di mi carera tabata firma extradicion di algun yiu di tera”

Mester a intermedia hopi biaha den problemanan entre gobierno y sindicatonan!

ORANJESTAD – Un bista unico esnan cu a presencia e

lectura interesante diahuebs anochi na Renaissance Conference Center a haya di e bida di un gobernador. Tabata diahuebs anochi cu e fundacion Digna Lacle Herrera a organisa un lectura unda cu e dos oradornan tabata ex gobernadornan Prof. Mr Jaime Saleh di Antia y mr. Olindo Koolman di Aruba. Aki por a haya un bista unico di nan experiencia como e representante maximo di

Reino Hulandes.

Den un sala di interesado, aunke no completamente yen, tanto ex gobernador Koolman como Saleh a recorri nan tempo como gobernador, splicando parti di nan funcion y tambe momentonan cu nan ta recorda como esnan mas recordable y porta mas oportunidad di haci pregunta na e dos oradornan.

E prome pa presenta su

mes tabata ex gobernador Koolman cu a cuminsa cu splica cierto leinan y statuut na cua e mester a mantene su mes na dje. Puntonan pa compronde e limitacion, obligacion y tambe derecho di un gobernador. Esaki pasobra hopi sa cu e persona tin e funcion, pero no sa berdaderamente kico e tarea diario di un gobernador ta ensera.

Loke a haci e anochi mas memorable, aparte di e recorrido di ley na y reglanan, tabata e anekdotanan personal, momentonan cu Koolman tabata corda como interesante y tambe menos interesante. Entre nan, Koolman a confesa cu un di e momentonan mas dificil den su carera como gobernador tabata ora cu e mester a firma pa extradita algun yiu di tera.

Un punto cu a hala atencion tambe ta e cantidad di biaha cu e la haya e solicitud di ciudadanonan cu ta apela na dje pa haci ‘algo’ cu e gobierno cu e tempo ei tabata na mando. Mester corda cu Koolman a fungi dos termino (normalmente

un gobernador ta apunta pa 6 anja: Red) y a pasa door di varios gobierno. E ta splica den forma comico cu ‘un gobernador tambe tin e ‘afamado’ postbus unda cu e ta ricibi cartanan y informacion, pero mas ainda, inquietudnan di comunidad.

E problema segun Koolman ta cu tin un pensamiento diferente di e ciudadano comun, y esnan cu ta na cabes di gobierno. No ta tur ora, pa no bisa nunca, gobernantenan ta pensa mescos cu e ciudadano. Y esei hopi hende no ta compronde. Y gobernador, siendo e persona intermediario, ta haye den un situacion fastioso tin biaha. Hopi biaha e tin cu intermedia entre Hulanda y Aruba.

Segun Koolman, gobierno hulandes no ta asina asina ta cai aden y tuma medida. “Cos mester echt bai for di man, prome cu nan por cai aden” Koolman ta bisa. Un di e peticionnan mas hopi cu a haya ta pa pone e mariniernan den funcion activo pa yuda combati entre otro criminalidad.”

Pero no ta asina asina ta haci esaki” gobernador Koolman a splica.

Loke cu hopi biaha gobernador Koolman tabata nota ta cu tabatin hopi problema entre gobierno y otro instancianan. Constantemente tabatin problema cu sindicatonan, welga y e tabata metepa asina trece pas entre e partidonan. E falta di disponibilidad pa intermedia di gobierno hopi biaha tabata bira un problema unda cu Koolman a conta con un biaha e la dicidi di manda su hendenan bai papia cu sindicato cu tabata welgando y a obliga ministernan pa sinta na mesa cu nan, usando gobernador mes como mediado. Y asina e problemanan tabata wordo resolve.

Den diano cu ta bin, lo tin mas informacion riba e anochi interesante aki y lo trece e banda tambe di ex gobernador Saleh, cu riba su mes tambe ta un encyclopedia di informacion debina su amplio experiencia y versatilidad riba multiple terenonan.